

四庫全書

集部

欽定四庫全書

集部

文忠集卷一百十三

詳校官庶吉士_臣李傅熊

主事_臣呂雲棟覆勘

總校官進士_臣楊懋珩

校對官學正_臣李巖

謄錄監生_臣李元位

欽定四庫全書

文忠集卷一百十三

玉堂類稿十三

宋 周必大 撰

金國賀正旦使副口宣

賀生辰使副口宣附

乾道七年

赴闕盱眙軍傳宣撫問賜御筵

有勅卿等肅持瑞節來會春朝念馳傳之良勤命及疆
而加勞錫之宴俎體我眷茲

鎮江府賜銀合茶藥

並係內侍何弼

有勅卿等謹于將命慶此發春既衝霰雪之寒復涉風
濤之險豈無錫予用助保頤

鎮江府賜御筵

有勅方歲更端寶隣修聘眷馳驅於遠道甫冒涉於長
江宜錫宴觴用華使節

平江府賜御筵

有勅三陽交泰四牡通歡乃眷輔藩有華候館載錫壺

觴之樂少休，輶傳之勞。

赤岸賜酒果

內侍蔣攸

有勅卿等遠修鄰好，來慶王春。事道路以良勤，望闕庭而甚邇。其頒芳旨，以勞皇華。

赤岸賜御筵

內侍徐永叔

有敕卿等聯華擁節，奉幣朝春。念久涉於修塗，命少休于近館。時頒宴飲，深體眷懷。

賜使副春幡勝

有勅歲律將新春陽先至言念光華之使馳分鏤刻之
工體我眷懷應茲嘉節

賜三節人從春幡勝

有勅汝等並從信使來慶春朝望北闕以有期值東風
之應律分頒在首悅懌永思

賜接伴使副春幡勝

有勅卿等祇承明命遠迓使華因巧歷之回春自尚方
而馳賜往應賁飾共樂芳時

到闕賜生餼

內侍符思永

有勅卿等來慶王春甫安賓館匪厚餼牽之錫曷酬軫傳之勞其體眷懷以承恩渥

到闕賜被褥沙鑼等

內侍李回

有勅卿等遠慶新元甫安上館維衾裯之加厚且器用之甚華併示匪頒欽承殊渥

歲除賜內中酒果

同前

有勅卿等言持使節甫達聘儀出醪核于嚴宸循壺觴

於除夕茲惟寵錫尚體醲恩

五月一日入賀畢歸驛賜御筵

內侍李月卿

有勅芳春肇序華使來賓既奉幣以退朝宜賜筵而在館體茲宸渥醑乃燕觴

入賀畢歸驛賜酒果

內侍董璉

有勅展議改歲復即舍館之安加禮待賓載厚果醪之賜式昭眷遇祗服寵頒

正月四日賜內中酒果

內侍麥敞

有勅使華之美已慶發春臺饋之豐無虛良日出珍嘉
於御府助燕樂於芳時

正月四日玉津園射弓賜弓箭例物

內侍陸彦

端

有勅倣氣回春皇華成禮命宏開於禁籞俾申講於射
儀宜有匪頒用將厚意

玉津園射弓賜御筵

內侍韓世榮

有勅卿等恪修鄰好祇慶春元爰成命射之儀就啟娛

賓之宴往膺異數用洽多歡

玉津園射弓賜酒果

內侍鄧珪

有勅歲華有俶春色始和少紓行李之勞載展穿楊之藝特加珍錫往侑宴觴

正月六日朝辭歸驛賜酒果

內侍李顯

有勅卿等告行闕下治任驛中惟鄰好之克修申眷懷而未已錫之芳旨服我龍光

朝辭歸驛賜御筵

有勅卿等謹於將命慶此履端念返旆之有期想騰裝
之良勩宜頒燕集式示寵私

密賜使副大銀器

內侍王公昌

有勅卿等來會春朝少休謁舍宜厚中金之錫以增行
橐之光尚克欽承式符眷賚

回程賜龍鳳茶并金鍍銀合

內侍霍汝弼

有勅春入東郊既講會朝之禮貢分北苑用為返旆之
光雖舉賜常寔昭眷寵

回程赤岸賜御筵

內侍朱思正

有勅卿等已祝春祺式旋使節望征帆之未遠開宴席
以少留毋惜滿觴載光行色

回程赤岸賜酒果

內侍李唐弼

有勅卿等禮成獻歲道次郵亭念涉履之方勤軫眷懷
而良厚既陳燕飲仍錫旨嘉

回程平江府賜御筵

內侍蘓駿

有勅卿等奉幣朝春回車涉遠念餘寒之尚力次近輔

以少留載示惠慈厚頒膏飲

回程鎮江府賜御筵

內侍徐偁

有勅卿等比緣歲旦來講鄰歡茲返旆於析津暫停駢
于京口宴觴甚寵恩渥其承

回程盱眙軍賜御筵

內侍譚何

有勅卿等已慶王春式旋使節念載馳於遠道命少駐
於邊城無惜屬餼以承渥賜

乾道八年

正月三日賜內中酒果

內侍梁琳

有勅乃眷使華務隆恩意輟甘芳於六尚助燕樂於初春維是寵頒往其欽受

正月四日玉津園射弓賜弓箭例物

內侍朱思

正

有勅春色初和射儀載肅式旌使範是來賜常頌錫命之有隆尚拜嘉而無斁

玉津園射弓賜御筵

內侍王公昌

有勅方駕鄰歡載優賓禮綵勝宜春之日彤弓展射之
時宜厚宴胥并資樂只

玉津園射弓賜酒果

內侍麥敬

有勅氣淑春郊禮成射圃濫香醪于玉罍粲芳實於瑤
盤匪我嘉賓孰昭殊遇

正月六日朝辭訖歸賜御筵

內侍符恩永

有勅卿等展儀獻歲授館浹旬甫陳告別之言載厚將
歸之禮惟茲示惠可以忘勞

朝辭訖歸驛賜酒果

內侍鄧珪

有勅卿等既陪元會甫告行期百壺良潔之英多品甘馨之實并申優遇當體至懷

密賜使副大銀器

內侍譚何

有勅卿等已慶端辰甫辭廉陛欲佐歸裝之用是攷珍幣之華眷待有加欽承無斁

回程賜龍鳳茶并金鍍銀合

正月八日
內侍黎典祖

有勅卿等飛蓋東風茲焉引道分珍北苑於以示恩無

忘拜賜之恭庸體睦鄰之意

回程赤岸賜酒果

內侍何弼

有勅卿等旋車云邁置餞有常出珍賜於宸廷侑宴歡於郊館推予恩渥寵乃賜華

回程赤岸賜御筵

內侍黃述

有勅卿等既成聘好方即歸塗宜少駐於郊闕俾載伸於燕餞式將厚遇聊慰遐征

回程平江府賜御筵

內侍徐永叔

有勅卿等夙駕歸艍少休會府特舉肆筵之禮冀忘握節之勞益洽恩私用紓行役

回程鎮江府賜御筵

內侍徐偁

有勅卿等還轅易水弭蓋京江雖並鷺於歸心尚曲留於別宴勿辭酣飲庸對芳辰

回程盱眙軍賜御筵

內侍董璉

有勅卿等並修使事還賜邊庭尚當春候之融和冀忘征塗之勤勩少留祖席尚體眷懷

淳熙三年

赴闕盱眙軍傳宣撫問賜御筵

有勅卿等恪修鄰好來會春元宜賜宴於邊城用增華
於使驛毋辭劇飲庶體醲恩

賜使副春幡勝

有勅使來北道春兆東郊允懷將命之勤爰有應時之
錫載茲嘉惠浣乃征塵

賜三節人從春幡勝

有勅卿等受命中朝迂賓北道當迎春之令旦頒揀道之多儀敬體朕懷增光使事

赴闕鎮江府賜銀合茶

有勅卿等肅將使指來覲春朝念寒色之嚴凝布恩言而存撫仍頒飲劑用助保調

鎮江府賜御筵

並係內侍謝安民

有勅玉歷開端寶隣修聘念衝寒而利涉爰錫燕以示慈往體眷懷勿辭飲醕

平江府賜御筵

內侍梁琳

有勅卿等適當冬凜來慶春元念使事之良勤即輔藩
而少駐特頒宴惠尚體眷私

赤岸賜御筵

內侍張思溫

有勅歲事一新鄰歡載睦嘉使禮之近止秩賞宴以樂
胥適屬隆寒固宜霑醉

赤岸賜酒果

內侍王敦禮

有勅卿等遠慶新春甫臨近驛錫上尊之醇上豐庶品

之珍甘茂對恩華增光使節

十二月二十八日賜生餼

內侍韓世榮

有勅卿等祇講歲儀夙行賓禮停騷在館浸休涉履之勞維餼及牽往示眷懷之厚

歲除賜內中酒果

內侍賈惟清

有勅卿等來慶春朝適臨除夕賜以芳樽之旨侑之苑寔之多併寵使華尚欽恩遇

正月一日入賀畢歸驛賜御筵

內侍李唐卿

有勅卿等將命北鄰展儀上日爰即驛亭之遂就頒燕
豆之華庸示寵光尚均愷樂

入賀畢歸驛賜酒果

內侍朱思正

有勅元會告成賓客甚肅爰賜燕觴之助用資雞旦之
歡維是旨嘉式彰優異

正月三日賜內中酒果

內侍王敦禮

有勅卿等已慶春朝少安館次特厚宮庭之賜併為觴
俎之華茂對恩私益光使指

玉津園射弓賜弓箭例物

內侍吳因

有勅熙春日永禁籥風和載講射儀脩觀使範爰厚頒
宣之寵用昭眷獎之恩

玉津園射弓賜御筵

內侍陸彥端

有勅交歡鄰壤已肅賓儀觀德春郊更優射藝宜持頒
於燕飲尚深體於眷私

玉津園射弓賜酒果

內侍張詠

有勅卿等遠慶春元載陳燕射尊實既多之醞盤盈孔

庶之珍眷待有加欽承無斁

淳熙四年

赴闕平江府賜御筵

內侍梁襄

有勅卿等遠冒臘寒來趨歲節即中吳之會府陳列俎
之多儀既勞使華仍昭眷禮

十二月二十四日赤岸賜御筵

內侍張思溫

有勅歲律將新使禮並驚雖慶賀之未展在馳驅而甚
勞爰即郊闕就頒燕飲

赤岸賜酒果

內侍謝安民

有勅歲功默運倣慶新春鄰使遠來益修舊好迎頒醪
核寵勞驂駢

十二月二十五日到闕就駟賜衾褥鈿鑪

內侍

吳春年

有勅卿等冒茲冬凜會我春朝既從舍館之安宜具燕
私之用睦鄰厚矣稽首承之

十二月二十八日賜使副春幡勝

內侍李琪
每人渾金大

春幡一副五事件背羅大春幡勝一副
紙帖落春盤每人肉七觔生雞鴨子各十五
個軟餅五十個菜四觔
法酒四瓶饅餅三十個

有勅土牛鞭春使壯在館綵勝春幡之巧珍羞名醞之
豐示我渥恩賚茲佳節

賜三節人從春幡勝

有勅汝等夙對天墀適逢春日欲示眷懷之渥宜頒鏤
刻之工

賜生餼
內侍何弼

有勅卿等已達聘儀少安謁舍爰舉餽牽之禮用酌跋涉之勞式是眷懷尚欽飫賜

歲除賜內中酒果

內侍賈惟清

有勅眷言嘉客遠慶元正酒分金殿之醇果富瑯盤之品用資守歲以示發春

正月一日入賀畢歸驛賜酒果

內侍王楫

有勅元會告成嘉賓就憩欲加隆於恩意爰就錫於甘芳勿謂常頒尚思祇服

入賀畢歸驛賜御筵

內侍楊彬

有勅獻竿宸廷已講發春之禮飛觴驛舍是資卜畫之歡式宴嘉賓徃欽厚意

正月三日賜內中酒果

內侍徐考叔

有勅芳春意淑素月魄生嘉使介之成儀佇驛亭而俟燕載頌醪核昭示眷私

正月四日玉津園射弓賜御筵

內侍高思聰

有勅卿等祇慶春元益修隣好嘉乃朝儀之肅復茲射

藝之精宜命賜筵用酌中的

玉津園射弓賜酒果

內侍朱思正

有勅弧矢之威古今所重是將觀德非獨娛賓方展藝
於春郊宜助歡於禮飲

淳熙五年

赴闕盱眙軍傳宣問賜御筵

內侍李唐卿

有勅卿等遠冒臘寒來趨歲節念初臨於邊郡宜加勞
於征軒肇錫燕觴欽承眷禮

赴闕鎮江府賜御筵

內侍徐考叔

有勅歲律將新使華遠暨既涉風濤之險又衝雪霰之寒宜啟燕觴少休征擢

鎮江府賜銀合茶藥

有勅四序更端兩邦結好乃眷皇華之使方臨鐵甕之城錫以珍良助其服食

平江府賜御筵

有勅芳春將屆膚使遠來久衝朔漠之寒少憇姑蘓之

館就頒宴飲昭示慈懷

赤岍賜酒果

內侍藍師古

有勅卿等抗旌賀歲飛擢及郊載稽勞問之儀特厚旨
嘉之錫式昭予眷諒慰爾心

赤岸賜御筵

內侍李琪

有勅卿等並涉修途來趨斯歲艤舩於近岸飛瓊
於華筵藉示湛恩用光聘使

到闕賜被褥沙羅

內侍鄧椿年

有勅卿等遠趨歲旦初憇驛亭首加錫賚之豐兼造寢
興之用將予厚意俾爾如歸

十二月二十八日賜生餼

內侍何弼

有勅卿等修好寶鄰展儀春殿方旅陳於書幣宜加錫
於餼牽式是寵私尚其祇服

歲除賜內中酒果

內侍宋昡

有勅卿等持節造朝停驂在館將展發春之慶有懷守
歲之歡錫以旨嘉資其燕飲

正月一日入賀畢歸驛賜御筵

內侍陸產端

有勅卿等歲華伊始賓禮具成即其舍館之安錫以壺觴之樂勿辭饜飫用迪眷存

入賀畢歸驛賜酒果

內侍王楫

有勅卿等遠持瑞節來會春朝既展慶於大庭方留裝於上館趨頒醪核往佐豆觴

正月三日賜內中酒果

內侍朱思正

有勅卿等遠慶元正深嘉使範推禁中之甘旨為館下

之光華惟是寵頒昭吾殊勝

玉津園射弓賜弓箭例物

內侍謝安民

有勅春和凝籥郊射穿楊觀賓禮之甚修知鄰歡之滋
輯宜加錫賚用示眷私

玉津園射弓賜酒果

內侍賈惟清

有勅玉津開端寶鄰繼好眷娛賓之厚禮有觀德之多
儀爰錫甘芳用酌審固

玉津園射弓賜御筵

內侍高思聰

有勅肇易歲華遠勤隣聘已講壽觴之禮再觀射藝之儀將寵眷私特申宴惠

正月六日朝辭訖歸驛賜酒果

有勅卿等夙慶春華適違黼坐厚乃旨嘉之錫燕其稱
媿之勞當體至懷聿成嘉惠

朝辭訖歸驛賜御筵

內侍李琪

有勅卿等獻歲成儀授書復命言念歸裝之束是宜燕
席之開咸體異恩毋辭霑醉

密賜使副大銀器

內侍何弼

有勅卿等聯駕聘軺恪遵元會器厚滋山之錫禮優將
命之勤尚體恩懷益光賓範

回程賜龍鳳茶并金鍍銀合

內侍黃敞

有勅卿等具成慶禮已告行期分北苑之清風醒春郊
之歸夢有華邦錫用獎賓儀

初九日赤岸御筵賜館伴使副春幡勝

內侍董

友聞

有勅卿等膺被朝掄應酬使客惟芳春之令序有節物之常儀茲謂寵頒毋忘祗戴

賜金國使副春幡勝

同前

有勅卿等既經竣事已駕歸舟眷言郊餞之時適契鞭春之日寵頒節物昭示恩華

賜三節人從春幡勝

同前

有勅汝等來慶元正歸逢令序足頒節物以對春光

回程赤岸賜酒果

內侍董友開

有勅卿等已慶芳春式邁歸旆眷少留於近岸益加厚
於常頒惟是渥恩尚其祇服

回程赤岸賜御筵

內侍何弼

有勅卿等言趨歲節嘉修好之有常于邁春郊念遵塗
之未遠宜開寵餞用賁歸裝

回程平江府賜御筵

有勅奉幣上春已締兩朝之好飛觴近堞式華四牡之

歸祇服眷私勿辭飲酌

回程鎮江府賜御筵

內侍謝憲

有勅卿等祇慶歲端造歸朔塞歷江城而少駐屬春律
之餘寒大啟燕觴丕昭眷寵

回程盱眙軍賜御筵

內侍梁襄

有勅卿等稱觴歲旦旋旆朝廷將利涉於長淮爰示慈
於華燕茲惟寵餞以賁征鞍

淳熙六年

正月六日朝辭訖歸驛賜酒果

內侍賈惟清

有勅卿等春元成禮謁舍騰裝錫以香醪貳之嘉寔示以寵綏之意仍茲宴飲之歡

朝辭訖歸驛賜御筵

內侍李琪

有勅卿等謁辭春殿歸憇驛亭思加恩於賓儀爰就開於宴席尚欽慈惠益洽歡娛

回程赤岸賜御筵

內侍何弼

有勅卿等已慶春元式遄歸旆欲示使華之寵載伸郊

餞之儀方屬餘寒勿辭霑醉

回程鎮江府賜御筵

內侍梁彬

有勅春風應律揚歸旆以載塗北固留賓秩華筵而示
惠尚欽眷渥益洽歡娛

金國賀會慶節生辰使副口宣

乾道六年

玉津園射弓賜弓箭例物

內侍王裕

有勅卿等遠奉使華來修誕慶連采蘋之樂節講上苑

之射儀特賜珍良少酌審固

十二月二十三日玉津園射弓賜酒果

內侍徐

傳

有勅卿等甫展慶儀言游靈囿彤弓盧矢庸觀德於射
侯嘉核芳醪併示慈於宴席

玉津園射弓賜御筵

內侍韓世榮

有勅卿等稱慶宸廷展儀射圃稽周雅序賓之義合魯
人揚禪之言宜命加籩式旌中的

密賜使副大銀器

內侍黃述
正使一千兩副使五百兩

有勅卿等遠奉使華恪脩慶禮誠効嵩呼之祝器頒山
溢之珍宜即欽承用符眷遇

回程賜龍鳳茶并金鍍銀合

內侍霍汝弼

有勅卿等已奉壽觴式迺歸旆爰分攷於貢茗庸少浣
於征塵其體至懷以承嘉錫

朝辭訖歸驛賜御筵

內侍麥啟

有勅卿等已慶電樞方違象魏眷皇華之在館命高會

以飛觴茲謂醲恩勿辭霑醉

又賜歸驛酒果

內侍王公昌

有勅卿等脩成慶禮甫上謁辭出醪核於禁庭侑杯盤
於館燕往承嘉惠共體湛恩

回程賜使副冬至節絹

內侍朱思正
使副各五十疋

有勅卿等比緣誕序遠穆賓華前驅已戒於北歸中道
適逢於南至爰分厚幣用侈多儀

回程賜三節人從冬至節絹

上節絹各八疋內
都管二人各十二

足中節各五足
下節各三足

有勅汝等言從慶使並驚歸塗值來復之新陽舉匪頌
之故事各膺厚賜尚體隆恩

回程赤岸賜酒果

內侍李顯

有勅卿等稱觴壽旦返旆霜冬念甫事於遐征俾少休
於近驛載放芳旨加厚眷私

回程赤岸賜御筵

內侍蔣忱

有勅卿等來慶誕辰脩成使事方旋車於遠道姑弭節

於近郊載厚眷懷特申燕餞

回程平江府賜御筵

內侍李唐弼

有勅卿等脩慶誕期趨裝歸路預飾輔藩之館少休使節之驂其錫燕觴以優賓禮

回程鎮江府賜御筵

內侍朱思正

有勅卿等榮抗使旌遠敦鄰好肆展流虹之慶載勤馳驛之歸錫宴南徐增華北道

回程盱眙軍賜御筵

內侍鄧珪

有勅卿等壽儀既講使範有光歷候館以及疆指長淮而利涉宜陳燕俎以寵歸鞍

乾道七年

赴闕盱眙軍傳宣撫問賜御筵

內侍符思永

有勅卿等遠馳使驛來慶流虹有懷將命之勤當厚及疆之勞其陳宴俎以洽賓歡

赴闕鎮江府賜銀合茶藥

內侍張思溫

有勅卿等並飭使車來趨誕節偃薄風霜之肅馳驅川

陸之脩宜厚匪放用資真攝

鎮江府賜御筵

同前

有勅卿等肅將使指祇講壽儀歷候館以寢深錫宴觴
而加厚勿辭燕樂庸釋勤勞

平江府賜御筵

內侍鄭大亨

有勅誕序將臨鄰歡載講眷馳輶於遠道命弭節於近
藩儉爾豆籩示子茲惠

赤岸賜酒果

內侍李唐卿

有勅鄉等遠馳四牡來祝萬年錫以醇醪貳之甘實併
示近郊之勞欽承厚禮之攸

赤岸賜御筵

內侍韓世榮

有勅鄉等並持瑞節來奉壽觴勤遠役於初寒豐宴遽
於近館有華茲禮其肅而承

到闕賜被褥鈔羅

內侍王公昌

有勅鄉等來陳壽祝益締隣歡甫從舍館之安宜具燕
私之用茲惟寵錫其即欽承

到闕賜內中酒果

內侍徐永叔

有勅卿等甫達慶緘即安賓館惟是醇甘之品皆告吾
飲御之珍輟以示恩體茲加禮

十月二十二日上壽畢歸驛賜御筵

有勅奉萬年之觴方歸安於上館啟百籩之宴宜就秩
於初筵毋惜屬餐以承渥惠

上壽畢歸驛賜酒果

有勅卿等適稱壽畢爰憩驛亭錫之九醞之醇侑以百

嘉之實既推賜式亦獎賓儀

十月二十三日賜內中酒果

內侍李琪

有勅華車照路方觀射圃之歸嘉賓薦觴載出禁楹之
賜茲惟厚遇匪曰常頒

玉津園射弓賜弓箭例物

內侍王裕

有勅卿等遠飭聘車來趨誕節惟娛賓之盛禮有觀德
之舊儀嘉乃和容申之蕃錫

玉津園射弓賜御筵

有勅卿等甫伸慶祝庸講射儀諒弧矢之宣勤設鼓鍾
而肆饗茲惟厚禮併寵嘉賓

玉津園射弓賜酒果

有勅卿等奉幣誕辰禮無違者展儀別圃射則臧兮欲
資燕飲之歡特厚醇甘之錫

淳熙二年

到闕賜被褥鈔鑪

內侍韓世榮

有勅卿等並冒初寒來趨載誕憇驂駢而授館頒器幣

以宣恩聊浣遐塵即宜欽受

到闕賜生餼

同前

有勅誕節應期使輅將命念初安於館舍宜厚賜於餼
牽庸示撫存以昭睠遇

二十一日賜內中酒果

內侍李琪

有勅卿等夙駕征驂恪脩誕慶均清醇於玉斝貳甘脆
於瑀盤聊慰積勤併將厚意

十月二十二日上壽畢歸驛賜御筵

內侍王裕

有勅卿等倣稱壽畢歸憇驛亭眷祗命之良勤宜肆筵
而加勞庸將殊遇併禦凝寒

上壽畢歸驛賜酒果

內侍徐佺

有勅寶鄰修聘適展於壽儀珍果侑觴隨頌於賓館式
是眷懷之厚且酬拜舞之勞

二十三日賜內中酒果

內侍黃述

有勅卿等已奉壽觴方需燕禮出芳尊於尚醞分嘉實
於大官併寵使華欽承恩渥

玉津園射弓賜弓箭例物

內侍梁彬

有勅卿等誠通北道慶祝南山惟掌客之舊儀有射侯之故事宜推蕃錫用獎佳賓

玉津園射弓賜酒果

內侍王允修

有勅卿等入壽宸廷堅睦隣之永好出觀禁籞展發的和容加錫珍芳式資飲御

玉津園射弓賜御筵

內侍謝安民

有勅祝萬年於北闕使範可嘉共三乏於上林射儀更

肅可無燕席以洽賓歡

二十七日賜內中酒果

內侍王敦禮

有勅飛電流虹歲勤隣聘醇醪嘉果日致恩頒惟茲賓禮之優示乃使華之寵

密賜使副大銀器

內侍張思溫

有勅千秋紀節九牧貢金持推制器之餘庸示待賓之禮將予賜式寵乃使華

朝辭訖歸賜酒果

內侍謝憲

有勅卿等既成慶禮俶告行期洊頒品物之珍庸助杯
盤之樂增光謁舍胥洽宸恩

朝辭訖歸驛賜內御筵

內侍張思溫

有勅卿等申祝堯年告違漢陛舉加籩之厚禮致設醴
之醲恩言念將臨何辭盡醉

回程賜使副冬至節絹

全前

有勅卿等來會誕辰歸途令節禮厚庫縑之錫恩隨官
線之添滌乃征塵被子渥會

回程賜三節人從冬至節絹

同前

有勅汝等並從使節來祝壽祺言念歸塗適逢至日其
令賜帛以助禦冬

回程赤岸賜御筵

內侍張思溫

有勅展縵儀於壽旦已締隣歡弭歸棹於候亭載陳飮
餞茲惟示惠亦以紓勞

回程赤岸賜酒果

內侍張詠

有勅飛綏遐暨嘉請祝於修齡犯輶邁歸尚眷留於近

岸馳放醪核益溥龍光

回程平江府賜御筵

內侍賈惟清

有勅漢殿稱觴已効萬年之祝
吳門錫宴用華四牡之歸
矧屬凝寒固宜盡醉

回程鎮江府賜御筵

有勅卿等遠慶誕辰式遄歸旆
將問津於江滸聊弭蓋於藩方
載洽瞻私是頌燕勞

回程盱眙軍賜御筵

內侍王楫

有勅卿等遠持壽禮申締隣歡驚歸轡以良勤即邊亭
而少駐載陳宴豆庸餞使華

淳熙三年

玉津園射弓賜弓箭例物

內侍王公

有勅卿等並抗使旌來趨誕節禮容有肅射藝可觀宜
厚匪頒用昭眷寵

玉津園射弓賜御筵

內侍李唐弼

有勅卿瞻言苑囿近在郊坳弓矢斯張適宜於冬凜且

籩有楚併洽於賓歡

玉津園射弓賜酒果

內侍鄭安祖

有勅慶流虹之節已覲宸廷展中鵠之儀言游禁籞特
頒芳旨庸示寵光

朝辭訖歸驛賜御筵

內侍張思溫

有勅卿等遠修邦好肅講壽儀已告行期少休謁舍爰
就開于燕席宜深體於宸恩

朝辭訖歸驛賜酒果

內侍楊慶祖

有勅卿等恪脩隣好來慶誕符茲成禮以告行乃授書
而少憇載頌醪核昭示眷懷

回程賜龍鳳茶并金鍍銀合

內侍李宗因

有勅禮成誕節榮驚歸鞍有華貢茗之盼庸厚使車之
寵雖云于邁可以忘勞

回程賜使副冬至節絹

同前

有勅卿等曩馳使驛虔奉壽觴逮四牡之遄歸值一陽
之來復豈無恩賜庸示眷私

賜三節人從冬至節絹

有勅汝等有陪壽禮並鶩歸塗屬至日之舒長念嚴程之勤勩錫之幣帛體我眷懷

回程赤岸賜酒果

內侍黃

有勅卿等遠餽使裝來趨誕節歸舟載旆甫歷於候亭嘉寔薦觴更將於恩意

回程赤岸賜御筵

內侍張思溫

有勅卿等屬奉壽觴茲旋使節挂征帆而未遠經別岸

以少留欲示眷私更伸燕饒

回程平江府賜御筵

內侍梁彬

有勅卿等既奉壽觴式遄歸權即蘇臺之奧壤申燕俎
之多儀尚體茲懷何辭盡醉

回程鎮江府賜御筵

內侍宋思正

有勅卿等已會誕期式遄歸旆惟是丹陽之館臨於天
塹之津再啓壘尊少休徒御

回程盱眙軍賜御筵

內侍徐考叔

有勅卿等奉觴無爽出境有期爰即邊城再開華宴將
予厚意慰爾遐心

淳熙四年

赴闕盱眙軍賜傳宣撫問御筵

內侍王楫

有勅卿等遠趨誕節甫次邊城念跋履之良勞宜撫存
之加厚就頒燕衍深體眷懷

赴闕鎮江府賜茶藥

有勅卿等並持使節來會誕辰嘉遠涉于川途特馳頒

於茗劑諒體眷懷之厚頓忘行邁之勞

鎮江府賜御筵

並係內侍陸彥輝

有勅華渚流虹遠勤輶傳朱方錫燕爰啟尊壘其體湛

恩勿辭霑醉

平江府賜御筵

內侍賈惟清

有勅卿等展儀誕序弭楫輔藩馳遣侍璫就開燕席飲
此滑矣于胥樂兮

十月十八日赤岸賜御筵

內侍何弼

有勅卿等言馳遠道契飛電之嘉辰爰即近郊霈霈雲
之異渥諒增華於使節宜深體於眷懷

赤岸賜果

內侍李鼎

有勅使華有信及茲誕慶之期郊勞加隆申以甘芳之
錫尚抵眷渥庸洗征塵

十月十九日到關賜被褥鈔鑼

內侍鄧椿年

有勅卿等並膺遴選來會誕期肆頒服御之珍俾適燕
私之用茲惟異數以寵嘉賓

十月二十一日賜內中酒果

內侍李琪

有勅卿等來慶誕祥甫修觀禮輟禁局之醪核華賓驛
之豆觴有腆于頌宜欽而受

十月二十二日上壽畢歸驛賜御筵

內侍李唐

卿

有勅稱壽於庭鄰歡備講示慈於館宴席闋開既酌行
禮之勞且厚待賓之意

上壽畢歸驛賜酒果

內侍徐考叔

有勅千秋紀節百辟稱觴嘉華使之來庭成令儀而歸
驛宜頒芳旨用洽眷私

十月二十三日賜內中酒果

內侍監師古

有勅卿等遠將鄰聘夙講壽儀念舍館之少安宜旨嘉
之載錫是資燕飲其克欽承

玉津園射弓賜弓箭例物

內侍謝憲

有勅嘉乃使華閑於射藝既效椿齡之祝肆觀楊葉之
穿特厚匪頒用昭眷禮

玉津園射弓賜箭酒果

內侍宋敏

有勅醇醪列盎嘉寔盈盤眷言慶壽之賓再講和容之禮併茲寵錫往即欽承

玉津園射弓賜御筵

內侍梁襄

有勅稱壽廣庭威儀甚肅射侯別圃技藝尤精宜儻巨觴用娛賓客

十月二十六日到闕賜生餼

內侍何弼

有勅卿等通歡鄰壤展慶誕辰已脩輯於多儀方少安

於上館茲庸續食用勸加餐

十月二十七日賜內中酒果

內侍黃鑄

有勅宸廷獻肆已祈千萬之年嘉實侑觴茲有再三之錫出於御府光乃賓筵

密賜使副大銀器

內侍李琪同日

有勅卿等慶壽遠來受書適返身未離於丹闕器加錫於白金各體異恩欽承加惠

十月二十八日朝辭訖歸驛賜酒果

內侍高思

聰

有勅卿等自初稱壽暨此告行嘉儀範之可觀知虔恭
之匪懈再頒醪核往助盃盤

朝辭訖歸驛賜筵

內侍賈惟清

有勅卿等來奉壽觴具成賓禮分驪駒之將駕儼籩豆
之前陳屬此初寒均茲既醉

十月二十九日回程賜龍鳳茶并金鍍銀合

內

侍李宗因

有勅卿等奉觴誕日懋館來旬念將據於歸鞍庸分頌
於貢茗茲惟渥惠以寵行人

回程赤岸賜御筵

內侍李琪

有勅卿等祝萬年之壽為十日之留爰即近郊更開別
燕庶益光於行色尚深體於眷懷

十一月一日回程赤岸賜酒果

內侍楊純

有勅卿等既成壽禮載鶩歸舟即別岸以少留馳近墻
而加勞錫之甘旨體我眷私

回程平江府賜御筵

內侍謝安民

有勅卿等効祝南山言歸北道念勞神於遠役爰設醴
於近郊寒色方嚴飲觴宜醕

回程鎮江府賜御筵

內侍朱思正

有勅使範從容既歲儀於誕節歸塗安穩載弭楫於江
城就錫燕觴丕昭眷望

回程盱眙軍賜御筵

內侍梁彬

有敕卿等奉觴辰月還軫仲冬指淮岸以於歸即邊城

而少駐馳開燕俎寵餞使旌

淳熙五年

赴闕盱眙軍傳宣撫問賜御筵

內侍梁襄

有勅卿等來趨誕節甫次邊城肆伸加勞之儀乃厚初筵之錫茲惟異寵其克丕欽

赴闕鎮江府賜茶藥

有勅卿等遠馳瑞節來奉壽觴永惟冒涉之勞良軫眷懷之厚馳頒茗劑往助攝調

鎮江府賜御筵

並同內侍陸彥端

有勅卿等並將使指來會誕期念初涉於長江蓋少安於會府特頒燕衍昭示寵私

平江府賜御筵

內侍謝憲

有勅卿等並駕使航遠趨壽節即蘇臺之勝地開賓席之華筵方履初寒所宜盡醉

赤岸賜酒果

內侍李鼎

有勅卿等遠持聘幣來慶誕祥眷舟御之良勞望都城

而浸適宜頌芳旨式是眷存

赤岸賜御筵

內侍何弼

有勅卿等抗旌獻壽馳傳及都宜修郊勞之儀以作使
華之寵勿辭飲酌用對眷懷

十月十八日到闕賜內中酒果

內侍李唐卿

有勅誕節及期使華在館欲示眷私之意爰分禁苑之
珍有腆於頌宜欽而受

十月二十一日上壽畢歸驛賜酒果

內侍謝安

民

有勅卿等遠修鄰好初奉壽觴即其舍館之安申以果
醪之賜尚惟祇服庸體眷懷

上壽畢歸驛賜御筵

有勅卿等通兩國之歡祝萬年之壽甫成慶禮還憇驛
亭宜就啟於燕觴尚欽承於飫賜

十月二十三日賜內中酒果

內侍朱思正

有勅卿等既祝壽齡方需宸燕欲厚北鄰之好爰分中

禁之甘其克丕飲以承異渥

玉津園射弓賜弓箭例物

內侍黃鑄

有勅卿等誕期甫及華使遠來惟茲郊射之行時乃邦儀之重宜推珍錫以寵嘉賓

密賜使副大銀器

內侍李琪

有勅壽儀既講使範有光欲昭示於鄰歡特寵嘉於密賚尚其祗受體此眷私

回程賜龍鳳茶并金鍍銀合

內侍李宗

有勅獻壽南山已成賓禮分珍北苑用寵使華併錫寶
匱尚欽宸渥

回程平江府賜御筵

內侍徐考叔

有勅卿等奉觴壽旦返旆朔陸夙戒蘇臺寵頒華宴尚
體有加之意用舒于邁之勞

回程鎮江府賜御筵

內侍李唐卿

有勅卿等遠持慶禮備講壽儀當寒色之凝嚴眷歸塗
之勤勩即茲江國錫以宴觴

回程盱眙軍賜御筵

內侍賈惟清

有勅卿等展儀誕節復命鄰封將利涉於長淮宜少留
於邊郡特開宴席用勞歸鞍

淳熙六年

赴闕鎮江府賜茶藥

內侍王楫

有勅卿等遠將信幣祇會誕期念涉履之良勞軫眷存
而特厚馳頒茗劑庸輔保調

鎮江府賜御筵

同前

有勅祝南山之壽遠鴛使擅經北固之城寵開燕俎肆
厚睦鄰之禮益增將命之華

平江府賜御筵

內侍李鼎

有勅卿等恪修隣好來慶誕辰揚舟旆以遄征即藩維
而少駐特開華宴以示眷懷

赤岸賜御筵

內侍梁暉

有勅卿等祇講鄰歡恪趨誕慶眷遵塗之甚遠欣弭節
之有期爰即近郊特開華宴

賜被褥鈔鑼

內侍韓世崇

有勅卿等遠涉初寒恪遵趨誕錫以寢茵之具貳之器
用之良併示眷懷祇承禮遇

十二月二十二日上壽畢歸驛賜酒果

內侍何

弼

有勅誕期甫及聘使遠來居然有肅之容厚其無疆之
祝隨頒芳旨少酢恭勤

賜內中酒果

內侍梁暉

有勅卿等遠馳使節宿展壽儀茲弭節于驛亭繼分珍
於禁苑有加之禮宜肅其承

玉津園射弓賜御筵

內侍陸彥端

有勅賓輶遠暨禁籞宏開觀克敬之威儀知素嫺於弘
夫就頒燕勞昭示寵綏

朝辭訖歸驛賜御筵

內侍李琪

有勅卿等遠馳慶幣來會誕期既成禮以展辭將復書
以戒路就頒燕勞昭示眷留

密賜使副大銀器

內侍梁暉

有勅卿等祇講慶儀備成使事錫朱提之瑞器實北道
之歸裝眷待有加欽承無斁

回程賜龍鳳茶并金鍍銀合

內侍李宗回

有勅卿等奉觴成禮旋旆屆期指貢煔以分珍實寶匱
而加賜推予眷意寵乃使華

回程赤岸賜御筵

內侍黃鑄

有勅卿等肅駕歸艍整留近岸欲示勤渠之意再頒慈

惠之恩方屬嚴凝勿辭霑醉

回程平江府賜御筵

內侍朱思正

有勅奉觴良月彌堅兩國之歡旋權仲冬少憇三吳之
勝就開華宴加寵行人



文忠集卷一百十三

欽定四庫全書

集部
文忠集卷一百十四

詳校官庶吉士_臣李傳熊

主事_臣呂雲棟覆勘

總校官進士_臣楊懋珩

校對官學正_臣李巖

謄錄監生_臣李元位

欽定四庫全書

文忠集卷一百十四

玉堂類稿十四

宋 周必大 撰

天中會慶設醮青詞朱表

丁亥本命
詞表附

乾道六年

太乙宮開啓太上皇后生辰設醮青詞

伏以清秋過半慈闈臨彌月之期丹悃由中靖館整後
天之祝既恪陳於馨薦復高詠於靈篇伏願誠徹九霄

祥開萬壽皇矣上帝儻垂有赫之光至哉坤元永篤無疆之慶

滿散朱表

伏以厚德難名固集壽齡之永誕辰甫既必修子道之恭爰即殊庭仰祈冲鑒願契媯皇之得道更同金母之長生

茅山崇禧觀開啓會慶節道場青詞

孟冬紀月甲觀開祥瞻句曲之名山寔茅君之福壤敬

裒羽士祗款琳宮冀悃幅之上通紛祺祥之下集

滿散朱表

伏以載臨誕日肅舉真科迓續永年豈獨眇冲之專饗
導迎和氣所祈黎庶之均休仰冀聰聞具孚誠意

萬壽觀會慶節設醮青詞

伏以序正孟冬時臨誕月雖寅畏享福常懷翼翼之心
而聰明自民實賴昭昭之鑒肅壇場而歲事望霄極以
馳誠伏願受祉既多降年有永下逮含生之類溥均壽

域之躋

滿散朱表

伏以誕節載臨冲科備舉仰賴乾坤之造允儲家國之
祥繼明照四方益系隆於炎祚修已安百姓期敷錫於
洪恩

太一宮會慶節設醮青詞

伏以良月載臨實紀誕生之日嚴君在上盍伸歸報之
誠仰遡清都敬披丹悃伏願天心降格親壽延洪永承

膝下之歡常受域中之養

滿散朱表

伏以誕彌厥月敢希福祿之膺於萬斯年闕

淳熙二年

太一宮開啟會慶節道場青詞

伏以高高在上固曰難諶懇懇由中亦云易感當涼德

始生之序念嚴君載育之恩祇竭精忠具遵道式冀格
九清之祐同增萬壽之期

滿散朱表

伏以誕月載臨敢獨膺於戩穀嘉祥參集漸上及於庭
闈恪修清靜之緣仰助康寧之福誠心既達冲監必昭
願益嚮於真風庸永綏於榮養

茅山崇禧觀開啓會慶節設醮青詞

伏以誕序斯臨荷天休而祇畏神山雖遠按仙式以精

祈欽佇飈遊昭垂道蔭上則行二親之壽下焉陶萬國
之和曾是眇躬敢專鴻施

滿散朱表

伏以陰隲下民疇不依於造化誕彌厥月顧敢怠于薰
修已宣三洞之科斯迪九宸之監願敷帝祉長祐邦圖
更俾含生全躋壽域

萬壽觀開啓會慶節設醮青詞

伏以顧德弗類荷天降休家用平康民以寧一是因誕

序預被殊庭庸達至忱仰于洪造真延壽祉永奉親歡
下暨群生咸資餘蔭

滿散未表

伏以孟冬之月載臨震育之辰長發其祥夙賴監觀之
施企列真之歟駕宣秘洞之真科已罄肅恭必孚陰祐
均壽昌於有衆綿基緒於無窮

淳熙三年

萬壽觀開啓天申節道場青詞

伏以推仁恩於三紀丕冒華戎介壽祉于萬年上齊箕
翼雖神理不愆於報施抑人心難緩于禱祈是因彌月
之臨敬致籲天之懇仰繫洪造垂鑒丹衷佑至養於無
窮增修齡于有永

滿散朱表

伏以時當九夏節紀千秋預即洞庭恪遵道範茲崇成
於勝會庸歸報於慈親壽祉常增願比乾坤之永福基
彌固屹如山嶽之安

萬壽觀開啟會慶節道場青詞

伏以位臨大寶每依覆燾之仁月紀初生當致禱祠之
禮潛誠心於七曜修勝事於三旬玉佩金璫並披粹籍
珠巾琳几敬佇真游仰祈道妙之無方丕錫壽齡於有
永更推洪施普暨含生

滿散朱表

伏以集眷佑於眇躬已綏多祐嚴禴禳於誕日更舉舊
章脩殫懇懇之誠諒格蒼蒼之鑒上儲親祉常迪於康

寧下錫民禧永銷於疵癘

淳熙四年

建康府茅山崇禧觀開啟天申節道場青詞

伏以山如句曲顯聖佑於茅君人似華封祝睿齡於堯
帝茲屬誕祥之會載嚴道範之科遙命羽流敬邀鶴駕
格無窮之祉庶篤祐於親庭儲有美之休抑均禧於寰
宇

滿散朱表

伏以流虹飛電適逢載誕之辰率土溥天咸致永年之
禱眷仙都之在望跨福地以標靈具殫裡恪之誠仰動
希微之監冀垂鴻造密相慈親福如東海之深測之益
遠壽比南山之固仰之彌高

太一宮開啟太上皇后生辰道場青詞

伏以秋氣爰清應律筩於南呂坤儀至肅紀誕節於東
朝預即琳宮虔修道範伏願穹旻降鑒祉福增延永祐
光堯受萬方之至養上同金母亘億載以長生

滿散朱表

伏以坤德無疆將臨誕序祠庭有肅預講冲科熏修三日之間祈禱萬年之久載陳醮席仰格宸游庶因勝會之成益致嘉祥之集惟天為大固持俾壽之權如月之常願永容光之照

萬壽觀開啟會慶節道場青詞

伏以猥以眇躬紹於大寶干戈載戢年穀屢豐在涼德以何堪繁高穹之克相茲臨良月恭演冲科冀因誕育

之期少答生成之賜伏愿鴻私下濟丹悃上通覆燾之恩徧周於海宇延洪之壽參集於庭闈

滿散朱表

伏以月紀初冬時逢載育預即邃嚴之館具修清靜之緣逮此崇成罄茲精懇三辰順軌丕錫於休祥四海迓衡庶永消於災害敢忘惕厲祇荷監觀

太一宮會慶節設醮青詞

伏以氣正上冬時維良月內循菲質載紀誕期欲歸美

於庭闈必輸誠於穹昊祓除廣宇演暢真風庶丕集於
天休永同扶于邦祚

滿散朱表

伏以祇紹慶基載臨誕序臣之報上率崇彌月之勝因
子之愛親敢怠萬年之善頌乃宣科於清夜用輸懇於
層霄所祈冲監之下觀式俾嘉祥之來萃

建康府茅山崇禧觀會慶節設醮青詞

伏以祇紹帝圖夙依道蔭維茲良月時乃誕辰按十極

之冲科崇三茅之勝會川途雖邈悃幅自通徼福仙真
豈眇躬之尚享降康黎庶期壽域之全躋

滿散朱表

伏以月紀上冬時當載育遐瞻江表夙宅仙真祇祓壇
場具敷科式庶精誠之昭格致靈監之顧綏上俾二親
益隆於壽祉下令萬姓咸底於樂康

淳熙五年

萬壽觀開啓天申節道場青詞

伏以大德蕃昌應誕辰於中夏珍臺邃密崇勝事於三
旬庶假熏修式孚頌禱雲車風馬倘來顧於壇場舜日
堯年必永綏於壽祉

滿散朱表

伏以慈親在上方伸至養之恭炎律載中適紀誕彌之
慶積鴻因於一月通丹悃於層霄地久天長冀延壽籍
海涵嶽負仍固福基嘉與民生永依道蔭

太一宮天申節設羅天醮青詞

伏以天祐慈皇脩錫康寧之福日臨誕節更申頌禱之
言壇場普供於神天燈燭交輝於晝夜寥寥真境蘄垂
鑒于忱衷永永修齡愿益安於榮養

滿散朱表

律中蕤賓赫赫炎圖之盛慶鍾慈極綿綿鴻筭之長茲
廣設於醮筵既脩成於順事衍無疆之歷期祇荷於天
休扶不拔之基尚永隆於邦祚

茅山天申節設醮青詞

伏以風自南而解愠當夏序之中分電統北以呈祥記
親庭之載誕瞻神山之地邇企颺御之天臨祇誦寶書
具嚴勝會伏願玉宸佑德金籙延年同皇祚以無疆嚮
真風而罔怠

滿散朱表

伏以祇承慈父欣際誕辰乃眷名山有華靖館按冲科
於十極徼厚福於羣仙悃悃遙伸諒霄宸之不隔祺祥
紛委知親壽之無涯

太一宮開啟太上皇后生辰設醮青詞

伏以月紀仲秋旬踰再浹鍾太陰之爽氣紀載誕之昌
辰預即殊庭虔遵沖式縉琅函於永晝敷瓊席於良霄
仰止高穹尚孚丹悃願言壽母丕集洪休

滿散朱表

伏以善則致祥天無私覆靜而獲壽人有常言念祇事
於慈闈欣載逢於誕序歸誠道館祈福穹旻庶延億載
之期永對萬方之養

萬壽觀開啟會慶節道場青詞

伏以猥繇涼德寅紹炎圖時寔格於小康年屢書於大有靜言顯相實自高穹是因生育之期少答龐鴻之施清壇預禱冲式載嚴曼壽敢專冀永隆於親養多祥誕錫更丕冒於海隅

滿散朱表

伏以初度載臨荷天心之降嘏青陽夙啟依道範以宣科逮茲勝事之成翕爾純釐之脩既衍庭闈之算亦安

夷夏之民誓竭齋精仰酌覆幬

太一宮會慶節設醮青詞

伏以震夙之祥敢矜於一已延長之禱當及於二親恭
即琳房敬敷瑶席伏愿精衷上徹真馭下遊永綏壽考
之祺共保熾昌之祚

滿散朱表

伏以良月屆期記眇躬之初誕清宵藏事按祕洞之冲
科所祈戩穀之臻丕衍庭闈之慶瞻言洪造監乃至忱

淳熙六年

茅山崇禧觀開啟天申節道場青詞

伏以赤光照室蚤開濟於中興黃屋非心今優游於太
極宜協天人之應併為壽祉之符遙即神山恪陳醮席
百祥降善曾惟上帝之常萬歲聞呼尚荅崇嵩之禮

滿散朱表

伏以誕節斯臨國家共慶壽齡之祝夷夏全心瞻句曲
之奇峰駐列真之斂駕言馳悃幅脩罄薰修庶憑上善

之因申衍大椿之筭

太一宮天申節設醮青詞

伏以飛電應期普天獻祝矧在行都之近有嚴真館之
華敢怠熏修用伸頌詠伏願上穹監德衆聖垂慈錫親
壽於萬年均天休於四海

滿散朱表

兩首

伏以深仁厚德已全介壽之符秘籙真科更效延年之
禱慶多儀之告脩知冲鑒之聿昭尚俾君親永綏福祿

伏以欽承基緒載紀誕祥祗事尊親每思美報繹靈文
於寶笈徼福應於璿霄一曰壽以為先冀延丕祚萬斯
年而無斃永嚮真風

太上皇帝丁亥本命設醮青詞

乾道六年

萬壽觀純福殿開啟太上皇帝丁亥正本命月

道場青詞

維乾道六年歲次庚寅十月丁亥朔三十日丙子嗣天

子臣

御名

伏為光禿壽聖太上皇帝丁亥正本命長生

之月謹遣入內侍省東頭供奉官睿思殿祇候幹辦
龍圖天章寶文顯謨徽猷敷文閣幹辦講筵閣兼承受
幹辦萬壽觀鄭邦美等於萬壽觀命道士一十四人就
純福殿開啟靈寶道場一月日滿散設醮三百六十分
位點丁亥長命燈一壇謹上啟聖位伏以冲虛高蹈方
延安樂之年歷紀環周復次本元之月延九清之飈御
按三洞之真科仰冀天聰俯從人欲益介無窮之壽常

儲有美之休

滿散朱表

臣御名言伏為滿散光堯壽聖太上皇帝丁亥正本命
長生之月道場者伏以祇肇慶基尊承慈父屬上冬之
良月紀元命之嘉期豫闢清場虔輸丹悃冀默通於造
化庸丕錫於壽昌

萬壽觀純福殿開啟

維乾道六年歲次庚寅十一月丁丑朔十一日嗣天子

臣

御名

伏以光堯壽聖太上皇帝丁亥本命之辰謹遣

入內內侍省東頭供奉官睿思殿祇候幹辦龍圖天章

寶文顯謨徽猷敷文閣幹辦講筵閣兼承受幹辦萬壽

觀鄭邦美等命道士七人就萬壽觀純福殿開啟靈寶

道場一晝夜滿散設醮一百二十分位點丁亥長生命

燈一壇謹上啓聖位伏以釋帝位以無為方永康寧之

福按日躔而有次載臨元本之辰恭即琳房具宣寶籙

伏愿聖真來格誠慤上孚陰陽均四序之和甲子衍萬

年之數

滿散朱表

臣御名言伏為滿散光堯壽聖太上皇帝丁亥本命道
場者伏以甲乙相推紀親庭之元命夙宵致禱宣道館
之冲科已罄精衷必蒙嘉應冀百祥之穰簡保萬壽之
悠長

乾道七年

太上皇帝本命青詞

太一宮全

維乾道七年歲次辛卯正月丙子朔十二日嗣天子臣
御名伏為光堯壽聖憲天體道太上皇帝丁亥本命之

辰謹遣具官甘澤命道士七人就萬壽觀純福殿開啓
靈寶道場一晝夜滿散設醮一百二十分位點丁亥長
生命燈一壇謹上啓聖位伏以惕臨寶位日奉慈顏載
推元命之辰適在履端之月禱祈維舊頌祝更勤伏願
誠悃上昭真游下格春乃四時之首淑氣常臻壽為五
福之先修齡益茂

滿散朱表

臣御名言伏為滿散光堯壽聖憲天體道太上皇帝丁

亥本命道場者伏以歲律更端既行親庭之顯號命元
協日載嚴道館之冲科仰跂帝臨益孚神佑錫壽符而
滋永對天運以常新

太一宮介福殿開啟太上皇帝丁亥本命道場

青詞

維乾道七年歲次辛卯三月乙亥朔十三日嗣天子臣

御名

恭遇光堯壽聖憲天體道太上皇帝丁亥本命之

辰謹遣

某

官命道士二十一人於太乙宮介福殿開啟

靈寶道場一晝夜滿散設醮一百二十分位點長生命

燈一壇謹上啟聖位伏以普天致養祇承慈父之頽元

命紀辰適在季春之月被琳宮之勝地演寶錄之真科

伏愿誠格飈浮壽延斗籍益介熾昌之福永繫眷佑之

仁

滿散未表

臣御名言伏為滿散光堯壽聖憲天體道太上皇帝丁亥本命道場者伏以天休狎至方垂佑於慈親月律再周乃荐臨於元命跂九清之法御宗衆妙之高風冀俯監於誠忱益丕延於壽祉

萬壽觀純福殿開啟太上皇帝本命道場青詞

七月十四日

伏以慶衍親庭歷載推於初度祥開霄極節正邇於中元
斡年披寶籙之文版藉應丹臺之會壇場載肅香火

具嚴冀颺御之俯臨紛靈釐而下集

滿散未表

伏以惟孝可以事親當祈曼壽惟誠可以格帝務竭寸
心適元命之紀辰望層霄而薦信冀回冲鑒永錫殊休
乾道八年

太一宮開啓太上皇帝丁亥本命青詞

正月十

八日

伏以乾坤輔德宜壽祉之無疆臣子愛親在祈禳而有

舊時臨春首日協命元恪遵三洞之科冀衍萬年之筭
仰繫洪造垂鑒丹衷

滿散朱表

伏以歲紀載新每祝嚴君之壽日旬六浹復臨元命之
辰祗祓青陽脩成勝事仰賴神天之鑒俯昭人子之誠
永錫閔休益隆榮養

淳熙二年

太乙宮介福殿開啟太上皇帝丁亥本命道場

青詞

維淳熙二年歲次乙未九月己卯朔九日天子臣

御名

恭遇光堯壽聖憲天體道太上皇帝丁亥本命之辰謹
遣入內侍省東頭供奉官幹辦內東門司幹辦太一
宮霍汝弼命道士二十一人於太一宮介福殿開啟靈
寶道場一晝夜滿散設醮一百二十分位點長生命燈
一壇謹上啟聖位伏以乾稱乎父紀元命之休辰允正
乎秋適重陽之令節按冲科於瓊笈陳芳薦於瑤壇

延望真游具殫誠悃冀敷隆於道蔭永迓續於帝齡

滿散朱表

臣御名言伏為滿散光堯壽聖憲天體道太上皇帝丁

亥本命道場者伏以日六十而甲子乃周協初躔於密
度歲八千而春秋不老祝曼壽於嚴君闢琳宇以欽崇
荷璿霄之降格祈禳有恪既成勝妙之緣清靜無為必
介延長之祉

太乙宮開啟太上皇帝丁亥本命道場青詞

是

年又九月雖是十一月十日
猶是十月節故云俱應元命

伏以時臨良月日浹初旬按歷而推俱應親庭之元命
籲天而禱冀延斗籍之嘉祥高詠寶書敬陳瑤席伏願
精誠上達飈御下臨丕錫四時之休永綏億載之養

滿散朱表

伏以欲親之壽常懷頌禱之心紀命之元尤謹祈禳之
會邀瞻秘館備演冲科逮熙寧之崇成知圓穹之眷顧
尚恢鴻施永續蕃祺

萬壽觀純福殿開啟太上皇帝丁亥正本命長

生月道場青詞

維淳熙二年歲次乙未十月戊寅朔某日嗣天子臣

御

名伏為光堯壽聖憲天體道太上皇帝丁亥正本命長

生之月謹遣入內侍省東頭供奉官睿思殿祇候幹
辦內藏庫幹辦萬壽觀甘呂等於萬壽觀命道士十
四人就純福殿開啟靈寶道場一月日滿散設醮三百
六十分位點丁亥長生命燈一壇謹上啟聖位伏以倦

繁機而脫躐宜擁天休推元命之循環適臨月建修三
旬之道果蘄萬壽之帝齡伏願衆乂扶持上清眷佑永
錫無為之祉敢忘不宰之功

滿散朱表

伏以月在圉陽協命元於慈父誠通霄極祝嚴範于殊庭
肇朔旦以宣科逮晦辰而迄事冀集天真之佑丕延眉
壽之期

太一宮介福殿開啟太上白帝丁亥本命道場

青詞

維淳熙三年歲次丙申二月丁丑朔十一日嗣天子臣
御名恭遇光堯壽聖憲天體道性仁誠德經武緯文太
上皇帝丁亥本命之辰謹遣入內內侍省東頭供奉官
幹辦御藥院提點資善堂攢宮檢察承幹辦太一宮兼
幹辦璇璣觀霍汝弼命道士二十一人於太一宮介福
殿開啟靈寶道場一晝夜滿散設醮一百二十分位點
丁亥長生命燈一壇謹上啟聖位伏以親壽延洪甫慶

從心之歲春陽駘蕩又臨元命之辰載祓殊庭敬延真
馭庶假熏修之力益增安樂之年仰冀高明俯昭悃悃
滿散朱表

伏以日承慈極思曲盡於誠心時屬仲春適游臨於元
命有嚴道館載演冲科既克就於多儀諒丕延於萬壽
愿依洪造永錫靈釐

萬壽觀開啟太上皇帝丁亥本命道場青詞

六

月十四日

伏以火見金伏應炎圖有赫之期箕張翼舒占聖父無
疆之壽載因元命祇演真科庶資清淨之緣彌介康寧
之福九霄在望一意以祈

滿散朱表

伏以月紀林鍾日瀕既望方極幅幘之養適臨元命之
辰熙事既成忱衷斯罄冀衍難窮之筭長扶不拔之基
萬壽觀開啓太上皇帝丁亥本命道場青詞 八

月十五日

伏以天佑慈親日安榮養惟是中秋之節適茲元命之
辰祇闢清壇肅延真馭伏愿具孚誠悃丕錫吉康光動
壽星常見丙丁之度數超巧歷莫窮甲子之期

滿散朱表

日協命元每六旬而乃遇天從人欲惟萬壽之是祈當
月輪正滿之秋乃醮席慶成之夕願恢鴻施錫純嘏於
親庭誓竭丹心依至仁於道蔭

萬壽觀開啟太上皇帝丁亥本命道場青詞

十

月十六日

伏以月紀孟冬方過下元之節慶鍾慈父載臨初度之
辰爰即壽宮具陳章醮八遐九外略無塵翳之干億載
萬年宜有壽齡之報仰祈元造俯鑒忱衷

滿散朱表

伏以六旬紀日臨慈極之本元八會宣音按瑤壇之科
式陰騭不言而可喻誠心有感而必通矧東晨書積善
之功諒非一日則南斗注延生之籍宜介萬年

淳熙四年

萬壽觀純福殿開啟太上皇帝丁亥本命道場

青詞

四月十八日

伏以誕辰祝聖將臨一月之期元命紀辰載值六旬之
浹因人心之善頌闢道館之清場羽士精虔華燈炳煥
冀帝臨之有赫延親壽於無窮併集祺祥俯均家國

滿散朱表

伏以月當孟夏日近中休推親庭元命之辰按仙洞長

生之錄良宵載肅勝會告成天聽甚卑必鑒拳拳之懇
帝齡益永更儲簡簡之祥

萬壽觀純福殿開啟太上皇帝丁亥本命道場

青詞 八月二十日

伏以月臨南呂日浹再旬歷書秋序之平分史候壽星
之初見惟時聖父實紀命元修香火之緣冀潛通於精
意益松椿之壽庶長奉於慈顏

滿散朱表

伏以上協帝心知與齡之方永下孚民志諒祝聖以彌
勤載臨元本之辰脩舉重修之典伏愿天人交助丕延
萬壽之期福祿兩崇永對四方之養

萬壽觀純福殿開啓太上皇帝丁亥本命道場

青詞

十月二十一日

伏以日奉慈顏思形孝治屬載臨於元命庸脩舉於醮
儀懇懇之誠倘潛通於帝所綿綿之壽斯增集於親庭

滿散朱表

伏以月紀上冬日踰中澣按司天之舊歷紀慈父之元
辰申飭羽流具嚴道果茲訖熏修之禮諒儲高厚之休
尚俾君親永綏壽嘏

太上皇帝丁亥本命青詞

十二月二十二日

伏以支干配日載閱月而乃周臣子事親萬斯年而是
祝茲因元命敬板清壇宣永晝之科儀盛良宵之香火
蓋高在上庶幾精意之通降鑒不違所冀休祥之集

滿散朱表

伏以甫經臘月密近壺春嚮乾坤道泰之時仲君父命
元之祝祺祥有俶願借歲運以俱新清靜無為常若化
工之不宰忱言斯至陰騭必從

淳熙五年

太上皇帝丁亥本命青詞

七月二十六日

伏以命元之紀無窮六旬斯浹親壽之延有永一意以
祈茲仰格於真游庸脩輸於誠悃伏願祥開霄極福集
慈庭偕日月以常明與乾坤而等久

滿散朱表

伏以月往日來載值本元之旦天長地久必資清靜之緣爰屬孟秋脩成勝事注生南斗祈益永於慈齡錫福庶民願愈隆於孝治

萬壽觀開啟太上皇帝丁亥本命道場青詞 九

月二十七日

伏以天扶慈極方永壽齡霜肅杪秋又臨元命恭即邃清之館具陳勝妙之科伏願精意潛通鴻休允答無為

之樂坐閱於萬年有美之祥俯均於四海

滿散朱表

伏以暢臨寶位恪奉慈親載推元本之辰脩講熏修之
禮飈游斯集純嘏是宜久照常新願比方壺之日月凝
寒愈茂冀同上古之松椿

萬壽觀純福殿開啓太上皇帝丁亥本命道場

青詞 二月二十二日

伏以春瑄將分紀親庭之元命宵躔在望啓秘館之冲

科寶供陸離嬰香馥郁翳精誠之上達致飈御之下臨
顯相慈皇益介延長之壽瞻言道蔭永依保佑之仁

滿散朱表

伏以脫屣寰區方延萬壽循環元命載浹六旬既申頌
於靈篇亦脩陳于馨薦深惟誠愨諒格鑒觀錫有美之
殊休助無為之至樂

萬壽觀純福殿開啟太上皇帝丁亥本命道場

青詞 四月二十三日

伏以祗奉親懽日伸榮養屬履正陽之月載臨元命之
辰按秘洞之真科延列真之歟駕庶徼天祉益永帝齡
緬企靈觀俯垂丕佑

滿散朱表

伏以月琯再周首紀恢台之序親庭曼壽環臨元本之
辰按丹籙以宣科望紫霄而顙懇尚享冲鑒密導殊休
筭已永而彌增福方崇而更積齋顯斯至眷佑是期

萬壽觀純福殿開啟太上皇帝丁亥本命道場

青詞 六月二十四日

伏以閒燕怡神安受萬方之養本元紀命適臨季夏之辰惟普天輸祝聖之誠惟妙道著延祥之式是緝秘典夙啓清壇祈默下於靈觀益增隆於壽算

滿散朱表

伏以欽惟聖父燕處皇居既清靜以無為宜康寧之未艾茲推辰於元命載藏事於良宵誠愈罄而愈虔期上通於穹昊壽彌高而彌永迄垂佑於邦家

文忠集卷一百十四